

PEMBERITAHUAN PERTANYAAN
DEWAN RAKYAT, MALAYSIA

DARIPADA : Y.B. TUAN R. SIVARASA A/L K. RASIAH
(SUBANG)
PERTANYAAN : LISAN
TARIKH : 24.07.2017

Y.B. TUAN R. SIVARASA A/L K. RASIAH [SUBANG] minta **MENTERI KEWANGAN** menyatakan sama ada Kementerian akan meminda undang-undang sedia ada atau membuat dasar pruden berkaitan pengambilan deposit supaya tidak dieksploitasi oleh pengendali-pengendali haram permainan wang (illegal money-game operators).

JAWAPAN

Tuan Yang di-Pertua,

Untuk makluman Ahli Yang Berhormat, kesalahan-kesalahan yang berkaitan dengan 'money game' di Malaysia diperuntukkan di bawah beberapa akta dan tertakluk di bawah bidang kuasa agensi-agensi

penguatkuasaan seperti berikut :

- i) Bank Negara Malaysia (BNM), untuk kesalahan pengambilan deposit secara haram;
- ii) Polis DiRaja Malaysia (PDRM), untuk kesalahan berunsur penipuan;
- iii) Kementerian Perdagangan Dalam Negeri, Koperasi dan Kepenggunaan (KPDNKK), untuk kesalahan menjalankan perniagaan skim piramid;
- iv) Suruhanjaya Syarikat Malaysia (SSM), untuk kesalahan berkaitan dengan skim kepentingan; dan
- v) Suruhanjaya Sekuriti Malaysia (SC), untuk kesalahan berkaitan pelaburan sekuriti haram.

Oleh yang demikian, untuk memastikan keberkesanan penguatkuasaan undang-undang di bawah bidang kuasa setiap agensi, satu inisiatif penguatkuasaan bersepadu telah ditubuhkan melalui sebuah jawatankuasa antara agensi penguatkuasaan yang diketuai oleh Jabatan Peguam Negara (AGC) dan disertai oleh semua agensi yang berkaitan. *Platform* tersebut memberi peluang kepada semua agensi yang terlibat untuk membangkitkan isu-isu mengenai aktiviti '*money game*'.

Selain itu, jawatankuasa ini juga akan menilai pelaksanaan undang-undang yang sedia ada, serta membincangkan penyelesaian jangka masa panjang, termasuk keperluan sama ada undang-undang yang sedia ada mencukupi untuk membanteras skim pelaburan haram ini.

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DR. HAJAH SITI MARIAH BINTI MAHMUD

TARIKH : 24.7.2017

SOALAN : NO. 105

Dr. Hajah Siti Mariah Binti Mahmud [Kota Raja] minta **MENTERI PENDIDIKAN TINGGI** menyatakan apakah kementerian pernah melakukan penyiasatan ke atas universiti swasta dan Pusat Bahasa Inggeris yang bersabit mahasiswa asing yang salah guna visa pelajar untuk bekerja.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Tinggi (KPT) sentiasa menjalankan pemantauan dari semasa ke semasa bagi memastikan pelajar-pelajar antarabangsa yang melanjutkan pengajian di Malaysia tidak menyalahgunakan visa pelajar untuk tujuan lain. KPT juga turut menjalankan siasatan terhadap aduan yang diterima daripada mana-mana pihak mengenai institusi pendidikan tinggi swasta (IPTS) yang mengambil pelajar antarabangsa.

Jika terbukti berlakunya penyalahgunaan visa oleh pelajar-pelajar di sesebuah IPTS dan IPTS terbabit didapati tidak mengambil

langkah kawalan yang sewajarnya, maka lesen pengambilan pelajar antarabangsa IPTS tersebut akan disyorkan kepada Kementerian Dalam Negeri (KDN) supaya dibatalkan atau tidak diperbaharui. KPT turut bekerjasama dengan Jabatan Imigresen Malaysia (JIM) dan Polis Diraja Malaysia (PDRM) dari segi perkongsian maklumat dan pelaksanaan pemeriksaan bersepadu terhadap IPTS yang mengambil pelajar antarabangsa.

Pada tahun 2017, KPT telah mengambil tindakan pembatalan lesen pengambilan pelajar antarabangsa ke atas 6 buah IPTS manakala 8 buah IPTS tidak diperbaharui lesen pengambilan pelajar antarabangsa atas kegagalan memenuhi syarat-syarat yang ditetapkan oleh KPT dan KDN. Walau bagaimanapun, tiada rekod salah guna visa pelajar antarabangsa dilaporkan di Pusat-pusat Bahasa.

Selain itu, KPT melalui Education Malaysia Global Services (EMGS) turut menyediakan maklumat yang komprehensif menerusi *Students Application and Registration System (STARS)* iaitu sebuah aplikasi permohonan visa atas talian, untuk tujuan pemantauan dan pengurusan kemasukan pelajar antarabangsa ke IPT Malaysia. Akses kepada STARS juga diberikan kepada JIM dan PDRM untuk tujuan penyaringan permohonan visa. STARS merupakan langkah preventif yang diambil sebelum pelajar tersebut memasuki Malaysia atau diberikan pas pelajar oleh JIM.

**MESYUARAT KEDUA, PENGGAL KELIMA,
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : PUAN HAJAH SITI ZAILAH
BINTI MOHD YUSOFF
[RANTAU PANJANG]**

TARIKH : 24 JULAI 2017 (ISNIN)

SOALAN : 106

minta **MENTERI KEMAJUAN LUAR BANDAR DAN WILAYAH** menyatakan jumlah pelaksanaan projek-projek pembesaran dan baik pulih jalan dalam Parlimen Rantau Panjang sejak 2013 hingga kini.

JAWAPAN :

Untuk makluman Ahli Yang Berhormat, sejak tahun 2013 hingga kini, Kementerian ini telah melaksanakan sebanyak 46 Projek Jalan Kampung (PJK) di Parlimen Rantau Panjang sepanjang 22.56km keseluruhannya dengan jumlah peruntukan sebanyak RM3.74 juta.

Bagi projek di bawah Jalan Luar Bandar (JALB) pula, setakat ini tiada projek dilaksanakan sepanjang tempoh tersebut.